

L

93003



930030

┐

S



SUPERVISOR'S USE ONLY



NEW ZEALAND QUALIFICATIONS AUTHORITY
MANA TOHU MĀTAURANGA O AOTEAROA

QUALIFY FOR THE FUTURE WORLD
KIA NOHO TAKATŪ KI TŌ ĀMUA AO!

Scholarship – Te Hiranga 2015 Te Reo Māori

9.30 a.m. Rāhina 9 o te Whiringa-ā-Rangi 2015

Te wā: E toru haora

Te Tāpeke: 24

Tirohia mēnā e rite ana te Tau Ākonga ā-Motu (NSN) kei runga i tō pukapuka whakauru ki te tau o runga ake o tēnei whārangi.

E RUA ngā wāhanga o tēnei whakamātautau. Whakautua ngā pātai KATOA ki ngā wāhi wātea kua whakaritea.

Mēnā ka hiahia whārangi atu anō hei tuhituhi i ō whakautu, whakamahia ngā whārangi wātea kei muri o tēnei pukapuka.

Tirohia mēnā e tika ana te raupapatanga o ngā whārangi 2–16, kei roto i tēnei pukapuka, ka mutu, kāore tētahi o aua whārangi i te takoto kau.

HOATU TE PUKAPUKA NEI KI TE KAIWHAKAHAERE Ā TE MUTUNGA O TE WHAKAMĀTAUTAU.

Ngā Paearu	Ngā māka
Tikanga	
Reo	
Kaupapa	
TE TĀPEKE	/24

TĀ TE KAIAROMATAWAI MAHI ANAKE

HE KUPU WHAKATAKI

Tēnā koe kua uru mai nei ki te whakamātautau a Te Hiranga o Te Reo Māori mō tēnei tau. He whakamātautau mā te tauira e ako ana i te reo Māori, ā, e mārama ana ki te whakamahi pūkenga reo torohū, pūkenga reo whakaputa hoki o ngā wāhanga katoa o te whakamātautau nei, me kaha mai te ākonga ki te:

- tātari, te arohaehae rānei i ngā kaupapa
- whakaputa whakaaro motuhake, whakaaro kē hoki
- whakatakoto taunakitanga
- kōtuitui i ngā mōhiotanga.

Nā reira:

- āta pānuihia ngā kōrero tohutohu i mua i te mahi
- kia kaha mai ki te whakaoti i ngā pātai katoa
- me reo Māori ngā whakautu katoa
- e rima meneti ki te āta pānui i te whakamātautau katoa.

Ko te reo kia tika, ko te reo kia rere, ko te reo kia Māori!

TE WĀHANGA TUATAHI: HE PĀNUI – HE TUHITUHI

TŪMAHI TUATAHI: HE PĀNUI (60 meneti)

Panuihia te tuhinga nei: *Manahi, Haane Te Rauawa.*

Kimihia ngā rerenga kōrero ōrite nō roto i te tuhinga, ā, tuhia ki te wāhi kua whakaritea.

TŪMAHI TUARUA: HE TUHITUHI (60 meneti)

Whiringia tētahi kaupapa hei tuhinga roa māu, ā, kaua e iti iho i te 500 kupu.

TŪMAHI TUATAHI: HE PĀNUI, ME TE KIMI I NGĀ KUPU ŌRITE – HE MAHI AROĀ

Ngā tohutohu

Panuihia te tuhinga nei: *Manahi, Haane Te Rauawa*.

Manahi, Haane Te Rauawa (1913–1986)

Ngā Tāngata Taumata Rau

Nō Te Arawa; nō Ngāti Raukawa, he ihu oneone, he hōia, he kāmura, he kairūri waka.

Nō te 28 o Hepetema o te tau 1913 whānau ai a Haane Te Rauawa Manahi i Ōhinemutu i Rotorua, ko ia nei te pōtiki o ngā tama a Neti Mariana Insley rāua ko tana hoa tāne, ko Manahi Ngākahawai Te Rauawa. He kawai Kotimana nei tō tōna whaea, ā, nō Te Arawa mai hoki ia. He pānga anō hoki tō tōna pāpā ki a Ngāti Raukawa, ā, nō Te Arawa anō hoki ia. I kuraina a Haane, arā, he mea karanga kē ia e ana hoa ko Jack, ki te kura tuarua o Rotorua (Rotorua High School). Nō te mutunga o tana kura, i uru atu ia ki roto i ngā rōpu mahi rori, mahi atu anō hoki i runga i ngā whenua Māori, he ahu whenua pāmu nei te kaupapa. I tua atu i tēnā he āwhina anō tana mahi i tana matua kēkē ki te taha o tōna pāpā, i Matiu, i tana nei mahi papa rākau, hanga whare hoki. Nōna e taitama ana i hira ai tōna pai hei kaitākaro: he tino toa kē nei a Manahi ki te kauhoe, ā, ka rawe kē nei ki a ia ngā tākaro nei, te whutupaoro, te kaipara me te mekemeke. Tino hiahia anō hoki ia ki ngā mahi mai o waho, pēraka i te hī taraute, ā, he māhorahora noa ki a ia te mahi whakangau.

Nō muri tonu o te pakarutanga mai o te Pakanga Tuarua o te Ao i uru atu ai a Manahi ki te Ope Taua 28 (Māori) o Aotearoa [28th New Zealand (Māori) Battalion], arā, ki te hokowhitu Māori. I mua i tōna haerenga ki tāwāhi, ka moea e ia a Rangiwatea Te Kiri i Rotorua i te 24 o Hānuere o te tau 1940. I ngā whenua o Kariki (Greece), o Kariti (Crete) me Āwherika ki te Raki a ia e whawhai ana. I a ia i te pakanga i Āwherika ki te Raki, i tino kitea anō ōna kaha o te tino toa tino kaiārahi hoki.

Ko ia tētehi o te paratunu o te hokowhitu Māori, he mea whakahau nei i Āperira o te tau 1943 kia pāhoru, mau rawa i a rātau te tohu whenua nei a Takrouna, inarā, he tāmōre tokatoka, tūparipari nei, tata atu ki te kotahi mano putu te teitei ake i ētehi putunga uru ōriwa i raro ake. Toru rau ngā hōia Itāriana, Tiamana hoki e puri ana i te whakatāiri nei, ā, ka kino kē hoki tā rātau aneatanga i te ope taua o te Kotahitanga e kōkirikiri atu ana. Nā te kaha o te karawhiu mai o ngā pū mōta me ngā pū paku nei i tino uaua mōrearea ai tā rātau mahi, ā, nō muri mai i te tukunga tuatahitanga i te ata o te 20 o Āperira, tekau tāngata noa te toenga ake o te paratunu a Manahi, toru tekau kē pea tō rātau nui i te tīmatanga. Kātahi ka ārahi haeretia ake e Manahi, he rōpū, tokotoru nei ngā tāngata, mā te taha uru o te keokeo rā e piki atu ai. E āhei ai rātau ki te tae atu ki te wāhi nei, e rima rau putu te pikinga atu. Otirā, he tūmāhoehoe tonu atu nei te rua tekau putu ka eke atu ai. Poto noa ana te pakanga atu, whakahauraro mai ana te hoariri, e ono tekau nei tō rātau nui. Nō te taenga atu o te toenga mai o tō rātau paratunu, i mau tūturu ai te tāmōre nei.

Kāti, ko te takiwā nei i a rātau ka kino kē te karawhiua mai e ngā matā waipū a te hoariri, inā kē tō rātau nui, e mau tonu mai ana i a rātau ngā tauheke o te raki me ērā o te uru, tae atu ki te kāinga anō hoki o Takrouna. I te hinganga o tōna āpiha ngārahu, riro ana i a Manahi te whakahaere o te paratunu. I mau tonu te takiwā nei i a rātau ko āna tāngata, ā, nō te pau

haeretanga o ngā hāmanu me ngā ō, ko tana hokinga atu tēnā ko tana kotahi ki te papa ake o tōna ope taua, tiki putunga, tāngata anō māna. Kāore i mutu te kaha o te karawhiu mai o ngā taipara a te hoariri i a ia e haere atu ana, e hoki mai ana. Nō te ahiahi i whana whakairi ai te tinitini o te hoariri, kaupeka mai anō hoki ētehi. Ahakoa te hāngai tonu atu nei ki te pakū mai o te pohū me ngā pū itiiti, riro ana nā Manahi tonu i hautū te kōkiri atu o āna tāngata i te hoariri, ā, i te mutunga iho o tā rātau whawhai muha ā ringa atu nei, pareā atu ana e rātau te hoariri. Kāore i roa i muri mai, whakahirahiraia ana te rōpū o Manahi.

Nō te ata o te 21 o Āperira i whai tūranga ake anō te hoariri, ā, ahakoa te pūhia tonutia mai o ngā motā me ngā pū mīhini, riro ana i a Manahi te whakahaere o tētehi o ngā rōpū e rua, he mea tuki, pana tonu atu nei e rātau te hoariri. I te ahiahi pō, nōna tonu te whakaaro, i haria e ia he ope iti huri atu ai mā te taha whakarua o te tohu whenua nei, ā, nā te taumauri me te manawanui, mau ana i a rātau ngā putānga pū mīhini, putānga motā hoki. He aumangea nō te kōkiri atu i pau ai te kaha o te hoariri ki te wawao tonu, ā, pāhorō ana te katoa o Takrouna, āpiti atu ki ngā mau herehere, 300 te nui, me ētehi pū kūpara rahi nei.

I te pakanga o Takrouna, tino kitea ai te kaha o te kakari, te toa takitahi o ngā hōia, ka waiho ai hei mea whakawehiwehi mai me ērā katoa o te ope matua. Nō muri i te pakanga i tūtuhia ai a Manahi ki te Rīpeka Wikitōria (Victoria Cross), engari whakawhiwhia kētia ana a ia ki te tohu toa DCM (Distinguished Conduct Medal). Nō te marama o Hūrae i te tau 1943 i hoki mai ai a Manahi ki Aotearoa. [Taihoa ake rā, i kahurangitia a ia, inarā ka pōwhiritia nei ia e te kāwanatanga kia haere atu ki Rānana (London) mō te hīkoi whakatūtū wikitōria, ka mutu nei te pakanga.]

I tana hokinga mai, i uru atu a Manahi ki tētehi wānanga kāmura, he kaupapa tautoko nei nā te kāwanatanga hei whakanohonoho hōia, i Rotorua. Nō muri mai i whiwhi mahi ia i te hōhipera o Rotorua. Taihoa ake nei uru atu a ia ki te Tari mō ngā Mahi Nunui (Ministry of Works), he kairūri waka nei te mahi.

I ngā tau o muri o te pakanga i pūmau tonu te hiahia o Manahi ki te tākaro kauhoe, ā, e hia kē nei ngā kaihoe o Rotorua, i whakakite nei i ō rātau pūkengatanga i riro nāna i ako. He mema tūāpapa anō hoki a Manahi nō te karapu korowhao Springfield (Springfield Golf Club), me te kaiwhakaruruhau hoki mō te karapu mō ngā tāngata hī ika o Rotomahana (Rotomahana Anglers Club). Nō te matenga atu o tana wahine i te tau 1976, i nuku atu ai a Manahi ki Maketū i Te Moana-a-Toi-te-huatahi (Bay of Plenty). Nō te 29 o Maehe i te tau 1986 i mate aitūa ai a Haane Manahi i te motokā i te rohe o Te Puke. He mea tāpuke a ia i te urupā o tōna marae i Ōhinemutu i Rotorua, ā, tokorua āna tama i mahue mai i a ia. I te tau 1999 e haere tonu ana te mahi ki te whakakapi atu i te tohu DCM o Manahi ki te tohu VC.

TŪMAHI TUATAHI: HE PĀNUI AROĀ, HE KIMI I NGĀ KUPU ŌRITE

Tuhia ngā rerenga kōrero ōrite mō ngā rerenga e whai ake nei:

1. he pukumahi,

2. I a ia e taikaha ana i puta tōna toa ki ngā mahi a Rēhia

3. I ngā pakanga ki Awherika ki te Raki, māraakerake ana te kite i tōna pakari aumangea nei,
kaitātaki hoki

4. Ka kaha te karawhiu mai me te haukere o te kapa o te Kotahitanga e kakari atu ana.

5. Heoi anō, ko te wāhi i reira rātou ka pokea mai ki ngā pū matā hīrere a te hoariri

6. Ahakoa te wepu mai o ngā matā a te hoariri ki a ia, kotahi mai, ka hoki anō.

7. He kaioraora nō rātou te whakatumatuma atu i kaha ngoikore ai te hoariri ki te whakapākati

8. mahea ana te kite i te aukaha o nga kotuku rerenga tahi

9. Ka roa te wā, ka manawanui tonu a Manahi ki ngā mahi kauhoe

10. Ka tanumia ki te rua kōiwi ki ...

TŪMAHI TUARUA: HE TUHITUHI

Ngā tohutohu

Whiriwhiria mai kia KOTAHI te kaupapa hei tuhinga ōkawa māu, ā, tuhia mai ōu ake whakaaro e pā ana ki taua kaupapa. Whāia ko ngā āhuatanga tuhituhi nei:

- te tika o te whakatakoto, te ūpoko, te tinana, te whakakao i ō kōrero
- te ngako, te matū o te kōrero
- te whakamōmona, te whakawhānui me te whakahāngai atu hoki i ōu ake whakaaro
- kia kaha ki te arohaehae, te whakapuaki whakaaro
- ki te whakauru mai i ngā whakataukī, i ngā whakatau-ā-kī, i ngā kīwaha, i ngā rarangi waiata, haka rānei e hāngai ana ki tō kaupapa hei whakanikoniko i tāu tuhinga roa
- kia auaha te rautaki, kia Māori te wairua
- kua e iti iho i te 500 kupu.

Anei ngā kaupapa tuhinga.

1. Ka maumahara tonu tātou.
2. Whakahokia mai ngā tikanga taumou, hei rongoā i te riri.
3. Ka noho au ka tautoko i tā Apirana Ngata ki te tuku i te iwi Māori o tērā wā ki te pakanga nā te mea ...
4. Ka noho au ka tautoko i te whakahē a Te Rua Kēnana ki te tuku i te iwi Māori ki te pakanga nā te mea ...

Mahere whakaaro mō te Tūmahi Tuarua

TĀ TE KAI-
AROMATAWAI
MAHI ANAKE

Whakaraupapa haere ō whakaaro ki konei.

Kei hea / Āhea?

He aha te tino kaupapa?

Mahere whakaaro mō te Tūmahi Tuarua

TĀ TE KAI-
AROMATAWAI
MAHI ANAKE

Ko wai ngā tangata?

He aha ngā mahi?

He aha ngā rerenga tika, ngā kīwaha, ngā whakataukī, ngā whakatau-ā-kī, me ngā kupu tika?

TE WĀHANGA TUARUA: HE WHAKARONGO – HE KŌRERO

E RUA ngā tūmahi mō tēnei wāhanga.

TŪMAHI TUATORU: HE WHAKARONGO

He tautohetohe: *Te Kawa a Māui*

He tautohetohe te āhua. He whakarongo ki tētahi tautohetohe, me te tuhi hoki i ngā whakaaro matua, i ngā kīwaha me ngā whakataukī, whakatau-ā-kī rānei hei āwhina i a koe i roto i te Tūmahi Tuawhā.

TŪMAHI TUAWHĀ: HE KŌRERO:

- (a) He whakaputa kōrero whakarāpopoto i te tautohetohe.
- (e) He whakaputa kōrero e whakaae ana, e whakahē ana rānei i te kaupapa o te tautohetohe.
- (i) He whakamahi i tētahi kīwaha me ngā whakataukī, whakatau-ā-kī rānei e RUA.

TŪMAHI TUATORU: HE WHAKARONGO

He tautohetohe te āhua o tēnei mahi whakarongo.

Ngā tohutohu

1. Whakarongo ki te tautohetohe.
2. I a koe e whakarongo ana, whakarārangihia ngā kaupapa matua a ngā kaikōrero e RUA ki roto i te māhere whakaaro kua whakaritea.
3. Āta whakarongo hoki ki ngā kīwaha kei roto i te tautohetohe nei, ā, tīkina kia rua ngā kīwaha e mārama ana ki a koe.
4. E TORU ngā whakapāohotanga o te tautohetohe, ā, kia mutu te whakapāohotanga ka wātea mai te 15 meneti hei whakarite i āu kōrero whakaputa.
5. **Mutu ana i te whakarite kōrero, hoatu tāu pukapuka whakamātautau me ngā pepa whakarite tuhinga ki te kaiwhakamātautau.**

Nā reira kia areare mai ō taringa, anei te kōrero.

Mahere whakaaro – *Te Kawa a Māui*TĀ TE KAI-
AROMATAWAI
MAHI ANAKE

Taha whakaae	Taha whakahē
--------------	--------------

Ngā Kīwaha	Ngā whakatauki / whakatau-ā-kī
------------	--------------------------------

TŪMAHI TUAWHĀ: HE KŌRERO

Ngā tohutohu

1. Ko tāu mahi he whakarite kōrero whakaputa, e whakarāpopoto ana i te tautohetohe.
2. Whakapuakina ōu ake whakaaro e whakahē ana/e whakaae ana rānei i te kaupapa o te tautohetohe nei.
3. Whakamāramahia mai te tikanga o ngā kiwaha e RUA i rangona i te tautohetohe.
4. Kua e roa ake i te 5 meneti mō tāu kōrero whakaputa.

Na reira, kia kaha mai te:

- whakapuaki whakaaro whānui
- whakaraupapa tika i ō whakaaro
- whakaniko mā te kiwaha, whakataukī, whakatau-ā-kī, rangahau
- whakatakoto tika, otirā whakahua tika i ō kupu.

Mā te kaiwhakahaere koe e hari ki tētahi atu rūma, hei whakamau i ō kōrero kāre e āhei te hari pepa ki roto i tēnei rūma.

Tukuna tō reo kia rere, tō reo kia tika, tō reo kia Māori.

Ka whakamau i āu kōrero:

- (a) Ka heria koe e te kaiwhakahaere o te whakamātautau ki te rūma hopu kōrero ki reira noho wahangū ai.
- (e) Kia 5 meneti te roa mō ngā whakaritenga e pā ana ki te mīhini hopu reo.
- (i) Mutu ana te whakamau i āu kōrero ki te mīhini hopu kōrero, me waitohu e koe te kopae hei whakaatu nōu te reo kei runga.
- (o) Kua oti ngā mahi katoa.

He whakaputa kōrero whakarāpopoto mō te tautohetohe.

He whārangi tāpiri tēnei hei whakaoti i ō whakautu mēnā e hiahiatia ana.
 Āta tuhia te tau o te pātai.

TĀ TE KAI-
 AROMATAWAI
 MAHI ANAKE

TAU PĀTAI

93003